

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA KAKANJ  
Općinsko vijeće**

**Broj:** 01/1-27-Z/19

**Kakanj,** 28.02.2019. godine

**Z A P I S N I K**

**sa 27. redovne sjednice Općinskog vijeća održane 28.02.2019. godine (četvrtak) u velikoj sali za  
sastanke Općinskog vijeća sa početkom u 9:00 sati  
(sažetak zapisnika)**

Nakon intoniranja himne Bosne i Hercegovine, 27. sjednicu Općinskog vijeća otvorio je Slaven Katičić, predsjedavajući Općinskog vijeća i pozdravio prisutne.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Džemal Bečirhodžić, Edin Aliefendić, Mejrema Purišević, Amar Selimović, Safet Šahman, Nadina Kovač, Senad Alajbegović, Namir Talić i Muhamed Kubat (**SDA**)

Jasmin Mušanović, Semir Mušija, Mirnes Merdić, Mugdin Gorak i Rizah Haračić (**SBB BiH**)

Rešad Merdić, Zerina Kovač, Fahrudin Buza i Mirsad Tursum (**S BiH**)

Ahmed Begić, Enes Piljug i Eldin Mijoč (**SDP BiH**)

Slaven Katičić i Ivica Petrović (**HDZ BiH**)

Elvedin Delić (naknadno pristupio) (**A-SDA**)

Nusret Muslić i Evelin Bitić (**samostalni vijećnici**)

**Odsutni vijećnici:** Izudin Hrusto i Adnan Ibrahimspahić (**SDA**), Adisa Škulj (**SBiH**) i Mujo Fafulić (**nacionalna manjina**).

Predsjedavajući je konstatovao da je na sjednici u momentu prijave prisutno 26 vijećnika i vijećnica, te da su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

**Aldin Šljivo**, općinski načelnik

**Ferdo Mijač**, sekretar Općinskog vijeća

**Enver Kusić**, sekretar organa uprave

**Mirza Fazlić**, pomoćnik općinskog načelnika za privredu, urbanizam i zaštitu okoline

**Džihad Berbić**, pomoćnik općinskog načelnika za finansije

**Rešad Zaimović**, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

**Alem Škulj**, ispred Službe za imovinskopravne, geodetske poslove i katastar nekretnina

**Nurudin Hrusto**, pomoćnik općinskog načelnika za civilnu zaštitu

**Zijad Neimarlija**, direktor Zavoda za planiranje i izgradnju općine Kakanj

**Izjesticci, obrađivači, gosti:**

Esmin Brodlija, predstavnik Grupe za podršku i zaštitu djece i mladih općine Kakanj

Jovanka Lazić, predstavnica World Vision-a

Adi Kubat, član Komisije za utvrđivanje naziva novih ulica općine Kakanj

Helmina Murtić, direktorica JU „Mladost“ Kakanj

Mirsada Čaluk, predsjednica UO JU „Mladost“ Kakanj  
Vahidin Topalović, komandir Policijske stanice Kakanj

### **Predstavnici medija:**

**NTV IC Kakanj**  
**Radio Kakanj**  
**„Kakanjske novine“**

**„Naša riječ“**  
**„Kakanjlive“**  
**„Kakanj-x“**

**„Kaportal“**  
**„Klix portal“**

Kratka saopćenja o radu sjednice i prethodnim pitanjima.

Kolegij Općinskog vijeća je 20.02.2019. godine, održao 27. sjednicu na kojoj je razmatrao:

#### **a) Inicijativu Slavena Katičića**

Nakon kraće rasprave Kolegij je donio sljedeći zaključak: „Kolegij Općinskog vijeća je upoznat sa Zakonom o državnoj himni BiH („Službeni glasnik BiH“ broj: 19/01 i 17/04) i ostaje pri stavu da se na početku redovnih sjednica Općinskog vijeća himna BiH izvodi.“

#### **b) Inicijativu Nusreta Muslića**

Kolegij je odlučio da se inicijativa vijećnika Muslića vezana za izdvajanje dijela vijećničkog paušala za liječenje dvije djevojčice iz Kaknja podijeli vijećnicima kako bi se samostalno izjasnili o istoj.

#### **c) Informaciju o izvršenim isplatama jednokratnih novčanih pomoći za nezaposlene pripadnike boračke populacije za 2018. godinu**

Kolegij je Informaciju primio k znanju.

#### **d) Zahtjev grupe građana u vezi plaćanja usluge zagrijavanja**

Kolegij Općinskog vijeća je sugerirao organima upravljanja JP „Grijanje“ d.o.o Kakanj da preispitaju Odluku o zagrijavanju stambenog i poslovnog prostora u Kaknju daljinskim grijanjem i Uslove za isporuku i preuzimanje toplotne energije iz daljinskog grijanja kako bi se razmotrila mogućnost ukidanja paušalnog plaćanja usluge zagrijavanja.

#### **e) Zahtjev grupe građana za uređenje saobraćajnice i parkinga**

Kolegij Općinskog vijeća je Zahtjev grupe građana za uređenje saobraćajnice i parkinga prosljedio Službi za privredu, urbanizam i zaštitu okoline na dalje razmatranje i postupanje.

Također, obzirom na sve učestalije zahtjeve građana za rješenjima parking prostora, Kolegij Općinskog vijeća je tražio od Službe za privredu, urbanizam i zaštitu okoline da se evidentiraju svi parkinzi, da se prezentiraju budući planovi u vezi rekonstrukcije, sanacije ili izgradnje parkinga u gradu, te ponudi rješenje upravljanja parking prostorom.

#### **f) Inicijativu za sanaciju prilaza, osvjetljivanje i izgradnju nove ili sanaciju postojeće željezničke stanice u Čatićima**

Kolegij Općinskog vijeća je Inicijativu za sanaciju prilaza, osvjetljivanje i izgradnju nove ili sanaciju postojeće željezničke stanice u Čatićima prosljedio Željeznicama Federacije BiH na dalje razmatranje i postupanje.

Također, Kolegij Općinskog vijeća je istu Inicijativu prosljedio Zavodu za planiranje i izgradnju kako bi razmotrio mogućnost da jednim rasvjetnim tijelom preko postojeće rasvjete osvijetli željezničku stanicu u Čatićima.

#### **g) Odgovor Službe za privredu, urbanizam i zaštitu okoline na Zaključak Kolegija**

Odgovor je prosljeđen grupi građana.

#### **h) Dopis advokata Suada Agića na Zaključak Kolegija Općinskog vijeća**

Dopis je primljen k znanju.

**i) Popis prioriternih projekata za uređenje infrastrukture u osnovnim i srednjim školama na području općine Kakanj**

Kolegij Općinskog vijeća je Popis prioriternih projekata za uređenje infrastrukture u osnovnim i srednjim školama na području općine Kakanj prosljedio općinskom načelniku kako bi, prilikom predlaganja programa utroška sredstava za 2019.godinu, razmotrio mogućnosti sufinansiranja istih.

Također, Kolegij je podsjetio da je na 26. sjednici usvojen Zaključak broj: 01/1-26-22/19 od 31.01.2019. godine, kojim se Općinsko vijeće izjasnilo u kojem pravcu bi se stanje infrastrukture u osnovnim i srednjim školama na području općine poboljšalo.

**j) Amandmane na Budžet Općine Kakanj 2019. MZ Zagrađe**

Kolegij Općinskog vijeća je amandmane MZ Zagrađe na Budžet Općine Kakanj 2019. prosljedio Službi za finansije na dalje razmatranje i postupanje.

**Usvajanje zapisnika sa 26. sjednice Općinskog vijeća:**

Predsjedavajući je zapisnik sa 26. sjednice Općinskog vijeća stavio na glasanje, te je isti usvojen jednoglasno sa 22 glasa za.

**Komentari na dostavljene odgovore na vijećnička pitanja:**

**Enes Piljug:** je rekao da je dobio odgovor na vijećničko pitanje u vezi problema prelaza učenika preko regionalnog puta R-445 koji pohađaju osnovnu školu u Donjem Kaknju. U odgovoru Službe za privredu je navedeno da je za učenike iz Dumanca, Desetnika i Rošćevine obezbijeđen autobuski prevoz do škole, te oni nemaju problem sa prelazom preko ceste, te je još navedeno da je Služba pitanje prosljedila Kantonalnoj direkciji cesta na daljnje postupanje. Naglasio je da prevoz nije obezbijeđen za učenike koji u pomenutu školu dolaze iz Popara i Rošćevine, te je tražio da se i njima obezbijedi prevoz kako ne bi došlo do saobraćajnih nezgoda i težih posljedica zbog prelaska tih učenika preko regionalne ceste. Drugo pitanje se odnosilo na različite koeficijente za obračun plaća u KSC Kakanj i da je po tom pitanju dobio sve koeficijente po radnim mjestima iz čega se vidi velika razlika u koeficijentima za pojedina radna mjesta sa SSS, što smatra da nije opravdano i da je nerealno velika razlika u plaćama među radnicima sa istom stručnom spremom.

**Rizah Haračić:** je rekao da je na prethodnoj sjednici postavio dva pitanja, te da nije dobio odgovor od TE i TC Kakaknj na pitanje koliko puta su ti zagađivači prekoračili dozvoljene vrijednosti zagađenja, u kojoj fazi je realizacija projekta postavljanja sistema praćenja u TC Kakanj, do koje mjere je stiglo odsumporavanje u TE Kakanj, te da li će se graditi blok 8 u TE Kakanj. Smatra da je neodgovorno od ovih subjekata prema društvenoj zajednici u kojoj posluju, da se ogluše na ovako važna pitanja i problematiku, te je rekao da je krajnje vrijeme da se počnu baviti problemom zagađenja stanovništva. Na drugo postavljeno pitanje da li mjerna stanica Općine može 30 dana pratiti zagađenje zraka usljed putničkog i teretnog saobraćaja u MZ Doboj je dobio odgovor Službe za privredu kojim je zadovoljan, gdje se kaže da su dobili saglasnost na postavljanje dodatne mjerne stanice koja će mjeriti nivo traženog zagađenja.

Predsjedavajući je pojasnio da prvo pitanje vijećnika Haračića nije prosljedeno na adrese obzirom da je jedno pitanje sadržavalo više pitanja o različitoj materiji, te ga kao takvog Služba nije mogla obraditi niti prosljediti nekome ko nije nadležan za određenu materiju, te je zamolio vijećnike da pitanja konkretizuju i adresiraju na nadležne za problematiku koja je sadržaj vijećničkog pitanja.

**Komentari na dostavljena mišljenja na vijećničke inicijative:**

**Semir Mušija:** je rekao da je zadovoljan što je od nadležne službe prihvaćena njegova inicijativa za općinsko sufinansiranje doktorske specijazacije, koja je prema procjeni i potrebi JU Dom zdravlja Kakanj najdeficitarnija.

**Enes Piljug:** je rekao da je imao dvije inicijative, a da je dobio odgovor na jednu koja se odnosila na završetak izgradnje vodozahvata za selo Kučiće. U odgovoru koji je dobio od Zavoda se navodi da je projekat izgradnje vodozahvata u Kučićima realizovan u dvije faze i okončan u 2011. godini, a da je prije samog ulaska u projekat bilo poznato da kapacitet istog neće biti zadovoljavajući zbog velikog broj

korisnika, ali se ipak pristupilo realizaciji. Rekao je da mu nisu bile poznate navedene činjenice, te da će pokrenuti inicijativu za izgradnju novog vodozahvata.

**Evelin Bitić:** je rekao da je dobio odgovore na dvije inicijative sa prethodne sjednice. Prvi se odnosi na inicijativu nabavke čistača snijega za potrebe JP „Vodokom“ gdje je nadležna služba istu prosljedila Vodokomu i gdje se navodi da to nije u nadležnosti općinskih službi, a druga inicijativa se odnosila na rješavanje problema parking prostora, gdje se u odgovoru službe navodi da je za rješavanje parking prostora na predloženi način potrebno izmijeniti regulacioni plan i obezbjediti znatna finansijska sredstva. Rekao je da su mu te činjenice poznate, te je pozvao sve da se aktivno uključe u rješavanje tog problema, te je rekao da smatra da bez obzira na visinu sredstava problem parkinga se mora riješiti, a to ulaganje će se isplatiti kroz duži niz godina korištenja parking prostora.

### **Vijećnička pitanja:**

**Eldin Mijoč:** je postavio dva vijećnička pitanja, prvo da li su postojala potrebna urbanistička odobrenja i saglasnosti za postavljanje bilborda na lokaciji kod skretanja prema bivšem DC-u u ulici 311. lahke brigade u Kakanj u vrijeme kampanje za Opće izbore 2018. godine, te ukoliko postoje tražio je da mu se dostave kopije istih i drugo pitanje koje stranke su kažnjene i zašto su kažnjene za postavljanje bilborda i ljepljenje plaketa u kampanji za Opće izbore 2018. godine i Prijevremene izbore 2019. godine u Kakanju.

**Rizah Haračić:** je postavio dva vijećnička pitanja i to da li će se u TE Kakanj graditi blok 8, koji je rok za izgradnju, te koje su prednosti i nedostaci gradnje istog, odnosno koja je korist od njegove izgradnje i da li je izgradnja bloka 8 u TE Kakanj uslov daljnjeg postojanja i rada TE Kakanj i drugo pitanje do kada je rok da JP „Elektroprivreda“ BiH – podružnica Termoelektrana Kakanj obzirom da je u obavezi, uradi odsumporavanje starih blokova radi smanjenja zagađenja kao i radi nastavka daljnjeg poslovanja.

**Muhamed Kubat:** je postavio pitanje zašto od strane RMU Kakanj nisu poduzete mjere i zašto ništa nije učinjeno do sada da se sanira i ugasi spontano zapaljenje uglja na području MZ Bukovlje, u neposrednoj blizini ulice Paše Kubata, a koje ugrožava stanovništvo pomenute ulice.

**Amar Selimović:** je tražio da mu se dostavi kopija provedene ankete koju je zahtijevao vijećničkom inicijativom od 31.01.2019. godine, te je postavio pitanje da li je potrebna izmjena Regulacionog plana da bi se promijenio saobraćajni karakter ulice.

Predsjedavajući je konstatovao da je vijećnik Mugdin Gorak iskoristio pravo na vijećničko pitanje bez korištenja govornice.

### **Vijećničke inicijative:**

**Enes Piljug:** je podnio dvije vijećničke inicijative i to da se uradi potporni betonski zid uz Regionalni put R-445, od rudničkog mosta u naselja Karaulsko polje do pilane „Silvestra“, radi zaštite u slučaju podizanja nivoa rijeke Bosne, kada dolazi do izlivanja vode na tom dijelu regionalnog puta, čime se ugrožava sigurnost mještana Karaulskog polja i druga da se pokrenu aktivnosti oko izgradnje novog vodozahvata i novog dovodnog cjevovoda za mjesto Kućići, obzirom da mještani imaju problem sa nedostatkom pitke vode.

**Mejrema Purišević:** je podnijela inicijativu da se na Regionalnoj cesti R-445 Kakanj – Visoko na potezu od pružnog prelaza do mosta u naselju Čatići izvrši izgradnja trotoara za pješake, a radi frekventnosti te dionice puta i bezbjednosti pješaka koji vrlo često koriste istu, obzirom da se u neposrednoj blizini nalazi autobusko stajalište i pružni prelaz.

**Safet Šahman:** je podnio dvije vijećničke inicijative, prvu za održavanje sastanka sa privrednim subjektima RMU Kakanj – TC Kakanj – Trgošped Kakanj, na koji bi trebao biti pozvan i premijer Vlade ZDK, a vezano za rješavanje problema putne komunikacije Kakanj – Podborje – Brnjic i drugu da se izgradi 6 natkrivenih autobuskih stajališta (nadstrešnica) u pravcu Brnjica iz razloga olakšavanja uslova korištenja javnog saobraćaja.

**Amar Selimović:** je podnio vijećničku inicijativu za izmjenu Odluke o zonama sanitarne zaštite i zaštitnim mjerama za izvorište „Pitka voda“ Kakanj (broj: 01/1-14/14 od 31.01.2014. godine) i to član 12. (Nadzor) stav 2. Odluke, iz razloga lakša saradnja između JP „Vodokom“ i Općinske inspekcije.

**Namir Talić:** je podnio dvije vijećničke inicijative, prvu da se postavi putokaz u pravcu Kraljeve Sutjeske koji bi pokazivao pravac džamije „Sultan Mehmed Fatih“, a radi lakšeg snalaženja posjetilaca izvan Kakanja koji posjećuju tu džamiju i drugu da se na putu od objekta „Pojata“ prema šehidskoj česmi u naselju Varda i dalje do kraja ulice 4. juli na izlazu iz „Grebena“, postavi saobraćajni znak zabrane zaustavljanja i parkiranja na tom dijelu puta, zbog česte pojave da vozači parkiraju vozila na trotoaru i kolovoznoj traci, čime direktno utiču na bezbjednost saobraćaja i ugrožavaju sigurnost pješaka.

### **Utvrđivanje dnevnog reda:**

Predsjedavajući je predložio dnevni red koji je usaglašen na sjednici Kolegija 20.02.2019. godine, odnosno koji je u pozivu za 27. sjednicu Vijeća.

U raspravi po predloženom dnevnom redu nije niko učestvovao, te je Vijeće sa 25 glasova za, bez glasova protiv i uzdržan usvojilo dnevni red za 27. sjednicu.

### **Usvojeni dnevni red:**

1. Prijedlog odluke o donošenju Lokalnog akcionog plana za zaštitu djece općine Kakanj 2019-2021.
2. Prijedlog odluke o nazivima ulica na području općine Kakanj sa Izvještajem o radu Komisije i prijedlogom zaključka o utvrđivanju visine naknade članovima Komisije
3. Prijedlog programa o utrošku sredstava za informisanje za 2019.godinu
4. Izvještaj o realizaciji Programa utroška namjenskih sredstava za zaštitu okoline iz budžeta Općine Kakanj za 2018.godinu
5. Izvještaj o realizaciji Programa utroška sredstava iz budžeta Općine Kakanj za podsticaje u poljoprivredi za 2018.godinu
6. Prijedlog programa utroška sredstava iz budžeta Općine Kakanj za podsticaje u poljoprivredi za 2019.godinu
7. Izvještaj o realizaciji Programa utroška sredstava iz budžeta Općine Kakanj za podsticaj razvoja poduzetništva i obrta za 2018.godinu
8. Prijedlog programa utroška sredstava iz budžeta Općine Kakanj za podsticaj razvoja poduzetništva i obrta za 2019.godinu
9. Prijedlog programa rasporeda i utroška planiranih sredstava ostvarenih po osnovu posebne naknade za zaštitu od prirodnih i drugih nesreća namijenjenih za provođenje preventivnih mjera u 2019.godini
10. Prijedlog zaključka o davanju saglasnosti na Pravilnik o keoficijentima i platnim razredima JU za predškolski odgoj i obrazovanje „Mladost“ Kakanj
11. Prijedlog zaključka o davanju saglasnosti na Finansijski plan JU za predškolski odgoj i obrazovanje „Mladost“ Kakanj
12. Prijedlog rješenja o utvrđivanju prava vlasništva u korist Emira (Hamze) Husike iz Kakanja
13. Informacija o stanju javnog reda i mira, sigurnosti ljudi i imovine za 2018.godinu na području općine Kakanj
14. Informacija o poduzetim operativnim, sanacionim mjerama i drugim aktivnostima u periodu stanja prirodne nesreće na cjelokupnom području općine Kakanj

### **1. Tačka**

#### **Prijedlog odluke o donošenju Lokalnog akcionog plana za zaštitu djece općine Kakanj 2019-2021.**

Predlagač: Općinski načelnik

Obrađivač: Služba za društvene djelatnosti, boračka pitanja, raseljena lica, izbjeglice i povratnike i Grupa za podršku i zaštitu djece i mladih općine Kakanj

Izjavitelj: Esmin Brodlija, član Grupe za podršku i zaštitu djece i mladih općine Kakanj

U diskusiji su učestvovali: Eldin Mijoč, Rizah Haračić, Semir Mušija i Slaven Katičić.

**Eldin Mijoč:** je pohvalio angažman i trud uložen da se dokument sačini, ali je naglasio da je problem što ovakvi i slični strateški dokumenti Općinu ne obavezuju, nego samo služe za apliciranje prema fondovima. Pitao je da li je opravdano veliko ulaganje sredstava u stambeno zbrinjavanje Roma, jer je poznato da isti dolaze iz drugih općina i da se povećava broj Roma u Kaknju, u nadi da će Općina Kakanj riješiti njihov stambeni problem. Skrenuo je pažnju na veliki problem sa socijalnim statusom djece. Prije svega naglasio je problem sa prosjačenjem, zatim razbojništvo koje se manifestuje prema mlađim učenicima pri odlasku i dolasku iz škole. Naglasio je da je posjeta kladionicama i nargila barovima veliki problem u odrastanju i društvenom razvoju djece, što je potencijalni problem u budućnosti za roditelje i društvenu zajednicu. Također, istakao je problem sa psima lualicama koji su problem kako za djecu, tako i za odrasle. Napomenuo je probleme sa konzumiranjem alkohola, prostitucijom i uzimanjem narkotika od strane djece, što je sve češća pojava u društvu. Rekao je da smatra da je i internet veliki problem za djecu, te je apelovao da nadležni iniciraju sastanke sa policijom, Centrom za socijalni rad i svim drugim koji mogu doprinijeti da se navedeni problem socijalnog statusa djece popravi. Rekao je da se Plan može podržati, ali to ne znači da smo time zaštitili djecu, ali inicijative iz dokumenta mogu biti vodilja da se pokrenu aktivnosti na poboljšanju socijalnog statusa djece.

**Rizah Haračić:** je rekao da problem sa maloljetničkom delikvencijom, koja je tretirana na stranici 11. dokumenta, nije problem samo sa Romima, čak njegova iskustva i saznanja govore suprotno. Pohvalio je posao Komisije na izradi dokumenta i rekao da policija mora uložiti veće napore da se problem sa izvršavanjem krivičnih dijela od strane maloljetnika smanji, te je pozvao predstavnika Komisije da eventualno kaže koje kategorije ili grupe nisu obuhvaćene predmetnim dokumentom, a kojima bi se posvetila dodatna pažnja, kako bi se odgojili kao korisni članovi društva. Posebno je akcentirao problem sa višestrukim povratnicima u izvršenju krivičnih djela, te je tražio od Komisije da Vijeću sugeriše mjere za popravljjanje stanja u tom pogledu.

**Semir Mušija:** je pohvalio sačinjeni LAP, te je rekao da postoje u Kaknju određeni pomaci po pitanjima koja su tretirana dokumentom i naveo je primjer da veći broj romske djece pohađa školu. Sugerisao je grupi koja je radila na izradi dokumenta da se registruju kao udruženje, odnosno kao nevladina organizacija, koje bi bila nosilac aktivnosti iz dokumenta i kako bi mogli aplicirati za predviđena sredstva za realizaciju projekata.

**Slaven Katičić:** je izrazio sumnju da će sačinjeni dokument promijeniti stanje u društvu, jer smatra da je osnovni problem što sistem ne funkcioniše. Smatra da organi i institucije kojima je primarni zadatak zaštita socijalnog statusa djece ne izvršavaju ili nedovoljno kvalitetno izvršavaju svoje zadatke, pa zbog toga u dokumentu imamo podatke koji su poražavajući. Naglasio je da se dokument sa svojim sadržajem može podržati, ali da se mora više poraditi da institucije sistema obavljaju svoje zakonske obaveze.

**Esmin Brodlija:** je ukratko odgovorio na komentare vijećnika, pa je rekao da grupa ima za cilj da djeluje u pravcu prevencija, da pruži podršku u implementaciji važećih propisa, te da odgovori na prisutne trendove u društvu. Što znači, osnovni cilj je podržati institucije i potaći što veći broj aktera koji ne dolaze iz odgovornih institucija da daju doprinos u zaštiti djece i omladine. Rekao je grupa razmišlja o osnivanju udruženja, ali da se zbog odgovornosti i obaveza koje iz toga proizilaze još uvijek nisu odlučili za registraciju udruženja. Složio se sa komentarima da predmetni dokument neće promijeniti stanje u društvu dok veći angažman ne uzmu kako odgovorne institucije, tako i drugi građani koji na bilo koji način mogu doprinijeti realizaciji ciljeva i aktivnosti iz LAP-a.

Nakon diskusije Vijeće je usvojilo Odluku o donošenju Lokalnog akcionog plana za zaštitu djece na području općine Kakanj 2019-2021sa 21 glasom za, bez glasova protiv i 3 uzdržana.

## **Tačka 2.**

### **Prijedlog odluke o nazivima ulica na području općine Kakanj sa Izvještajem o radu Komisije i prijedlogom zaključka o utvrđivanju visine naknade članovima Komisije**

Predlagač: Komisija za utvrđivanje naziva novih ulica općine Kakanj

Obrađivač: Komisija za utvrđivanje naziva novih ulica općine Kakanj

Izjestilac: Adi Kubat, član Komisije

U diskusiji su učestvovali: Slaven Katičić, Eldin Mijoč, Evelin Bitić, Mirsad Tursum i Semir Mušija.

**Slaven Katičić:** je rekao da ulice koje su tretirane od strane Komisije nisu pokrile sve ulice bez naziva, odnosno pojedini kraci ulica nisu obuhvaćeni prijedlogom Komisije. S toga je predložio da se odgodi izjašnjavanje po ovoj tački i prijedlog odluke vrati Komisiji na doradu, te da oni uzmu u razmatranje njegove i eventualne sve druge amandmane.

**Eldin Mijoč:** je pohvalio rad Komisije i rekao da svako ime zasigurno zaslužuje da se nađe u ovom prijedlogu. Međutim, rekao je da prijedlog da se ulica na Plandištu zove po šehidu Kovač Rahmanu, koji nije živio u tom naselju, je dosta osjetljiva stvar, pogotovo ako se zna da imaju dva šehida iz tog naselja. Zbog toga je predložio da se predmetna ulica, obzirom da je veoma dugačka, podijeli na dva dijela, tako da prvi dio od srednje škole do raskrsnice za gradsku deponiju nosi ime po šehidu Sikira Mehmedaliji zvanom Biki, dok bi drugi dio te ulice sa svim svojim ograncima nosio ime šehida Kovač Rahmana.

**Evelin Bitić:** je rekao da predsjednici MZ nisu bili obavješteni da će doći do promjene naziva ulica i nisu uzeli učešće u radu i predlaganju naziva ulica, te je primjetio da jedan krak ulice Nedžada Čišije nije pokriven nazivom, kao i nazivom ne pokriveni put koji povezuje ulicu Nedžada Čišije i ulicu Mukadesa Husagića. Smatra da je javnost trebalo malo bolje obavijestiti o predmetnim aktivnostima, jer na terenu već postoje određena negodovanja.

**Mirsad Tursum:** je predložio da se jednoj od ulica dodjeli naziv po Srđanu Aleksiću, momku koji je poginuo braneći sugrađanina Bošnjaka.

**Semir Mušija:** je napomenuo da je zadatak Komisije bio da dodjeli nazive ulicama koje do sada nisu imale naziv. Zbog svih prijedloga koji su izneseni predlaže da se klubovi vijećnika usaglase i eventualno formira nova Komisija sa novim zadatkom.

Predsjedavajući je dao pauzu od 5 minuta.

Predsjedavajući je predložio da se svi amandmani upute Komisiji koja bi uzela u razmatranje sve prijedloge i ponudila cjelovito rješenje.

**Eldin Mijoč:** je predložio da se na ovoj sjednici vijećnici izjasne o prijedlozima koji su prihvatljivi već u ovom trenutku, a da se o ostalom ostavi vremena Komisiji da razmotri prijedloge.

Predsjedavajući je rekao da se Komisija ne može izjašnjavati ako nije u potpunom sastavu, pa smatra da je najbolje rješenje da se sav materijal sa amandmanima vrati Komisiji, koja će uzeti u obzir i ostale ulice za koje su izneseni prijedlozi naziva.

**Zijad Neimarlija:** je napomenuo da Komisija treba da ima na umu da su vijećnici na nekoj od ranijih sjednica usvojili odluku o granicama naseljenih mjesta i da je u skladu s tim izvršena numeracija. S toga je sugerisao Komisiji da predmetno uzme u obzir.

**Općinski načelnik:** je rekao da nije korektno da samo vijećnici imaju mogućnost predlaganja naziva i dodatnim ulicama, pa je predložio da se i građanima dadne mogućnost da u narednih 15 dana upute prijedloge naziva za ulice koje su na sjednici pomenute.

Predsjedavajući je predložio zaključak kojim bi se odgodilo izjašnjavanje o ovoj tački, obzirom da su svi saglasni sa prijedlogom, ali su se u toku rasprave iznijeti i prijedlozi za imenovanjem još ulica, tako da se svi amandmani iz rasprave upute Komisiji kako bi ista amandmane razmotrila i cjelovit prijedlog ponudila Vijeću na usvajanje. Također, po prijedlogu općinskog načelnika ostavlja se dodatni rok od 15 dana da se građanima omogući učešće, na način da Komisija uputiti poziv građanima da daju svoje prijedloge i sugestije. Zaključak je Vijeće usvojilo sa 23 glasa za, niko protiv i 1 uzdržan.

### **Tačka 3.**

**Prijedlog programa o utrošku sredstava za informisanje za 2019. godinu**

Predlagač: Općinski načelnik

Obrađivač: Stručna služba za poslove općinskog načelnika

Izvjestilac: Enver Kusić, sekretar organa uprave Općine Kakanj

U diskusiji su učestvovali: Eldin Mijoč, Rešad Merdić, Semir Mušija, Rizah Haračić, Safet Šahman i Slaven Katičić.

**Enver Kusić:** je rekao da je Program gotovo identičan sa prošlogodišnjim, da se radi o sredstvima koja su potrebna za informisanje, s tim što je napomenuo da je NTV IC Kakanj uputila prijedlog za povećanje svojih cijena, ali kako je Budžet Općine već usvojen kroz predmetni Program to nije moguće prihvatiti, te je predložio da Vijeće eventualno prilikom rebalansa Budžeta predvidi dodatna sredstva za informisanje.

Predsjedavajući je predložio da se uz Program utroška sredstava za informisanje usvoji zaključak da se prilikom rebalansa Budžeta odobre dodatna sredstva, iz neutrošenih sredstava iz Programa za informisanje, a za medije koji prate sjednice OV.

**Eldin Mijoč:** je rekao da smatra da se preveliki iznos sredstva izdvaja za informisanje, te je naglasio da klub SDP-a neće podržati izneseni prijedlog.

**Rešad Merdić:** je rekao da je stav kluba S BiH da na glasanje treba da ide prijedlog Programa kako je u materijalima, a ukoliko bude potrebe da će se dodatna sredstva obezbijediti kroz rebalans Budžeta, bez donošenja zaključka na ovoj sjednici.

**Semir Mušija:** je predložio da se Vijeće odvojeno izjašnjava o Programu i predloženom zaključku.

**Rizah Haračić:** je rekao da je ovo prilika da se u okviru predviđenih sredstava vidi mogućnost da mediji uživo prate sjednice OV, obzirom da su već ranije na njegov zahtjev odgovorili da postoje tehničke mogućnosti za to, te postoji i ponuda za takav vid izvještavanja.

**Safet Šahman:** je dao podršku NTV IC Kakanj imajući u vidu njihov doprinos u općem informisanju građana Kaknja, s tim da je predložio da isti prije emitovanja sjednice OV u nekoliko navrata najave taj sadržaj u vidu reklame, kako bi gledaoci bili upoznati o tome.

Predsjedavajući je pojasnio da zaključak koji je predložio ne predviđa povećanje iznosa sredstava za informisanje, nego je prijedlog da se iz neutrošenog dijela sredstava, kojih je bilo u prošloj godini, prebaci dio sredstava za sve medije koji prate sjednice OV, tako da se ne bi iznos povećavao, te je rekao da ostaje kod svog prijedloga zaključka o čemu se Vijeće može odvojeno od Programa izjasniti.

**Rešad Merdić:** je rekao da niko od vijećnika nije protiv kakanjskih medija, ali je predložio da se Vijeće izjasni o predloženom Programu, bez da se glasa o bilo kakvom zaključku, a ukoliko se predviđena sredstva za informisanje potroše, Vijeće može prilikom rebalansa Budžeta odobriti dodatna sredstva za tu namjenu.

Nakon rasprave Vijeće je usvojilo Program utroška sredstava za informisanje za 2019. godinu sa 20 glasova za, 3 protiv i 1 uzdržan. Vijeće je glasalo sa 10 glasova za, 3 glasa protiv i 9 glasova uzdržan, dok jedan vijećnik nije glasao, te nije usvojen zaključak da se prilikom rebalansa Budžeta iznos od 5.000,00 KM prebaci sa koda za informisanje na stavku praćenje sjednica OV i da se rasporedi na medije koji prate sjednice Vijeća.

Uslijedila je pauza od 1h u radu Vijeća.

#### **Tačka 4.**

#### **Izveštaj o realizaciji Programa utroška namjenskih sredstava za zaštitu okoline iz budžeta Općine Kakanj za 2018. godinu**

Predlagač: Općinski načelnik

Obrađivač: Služba za privredu, urbanizam i zaštitu okoline

Izvjestilac: Mirza Fazlić, pomoćnik općinskog načelnika



U diskusiji su učestvovali: Enes Piljug, Safet Šahman i Eldin Mijoč.

**Enes Piljug:** je tražio pojašnjenje za dvije stavke iz Izvještaja i to iz tabele broj 2 projekat „Eko-park“ Tršće, gdje je prema Izvještaju urađena prva faza projekta i određena sredstva utrošena, a prema njegovim saznanjima vrlo mali dio radova je urađen i druga stavka iz Izvještaja iz tabele broj 3 „Uređenje i održavanje zelenih površina“, tražio je pojašnjenje gdje su utrošena sredstva u iznosu od 125,000,00 KM, jer se iz obrazloženja to ne vidi.

**Safet Šahman:** je tražio pojašnjenje stavke iz tabele broj 2 „Povećanje energetske efikasnosti kroz utopljanje ambulante Krševac“. Prema Izvještaju od iznosa planiranih sredstava je ostao dio neiskorišten, jer se navodi da je projekat okončan. Rekao je da je ustvari završena druga faza projekta, te da smatra da se neiskorišteni dio sredstava u iznosu od 17.567,00 KM, trebao iskoristiti za postavljanje stolarije na objektu. S toga je predložio da se ta sredstva prenesu u Program za tekuću godinu i postavi stolarija na objektu.

**Eldin Mijoč:** je rekao da se predmetnim programom utroše velika sredstva, čiji bi osnovni cilj trebao biti zaštita okoline. Smatra da je u Kaknju zrak zagađeniji nego prije 5-6 godina, pa se pita da li se sredstva troše za projekte za zaštitu okoline. Pomenuo je utopljanje ambulante u Krševcu, postavljanje led rasvjete u Doboju, utopljanje mjesnog doma u Haljinićima i Bjelavićima, osvjetljenje ski staze na Ponijerima i još neki projekti za koje smatra da nisu iz oblasti zaštite okoline. Rekao je bi trebalo sredstva iz ovog Programa trošiti na projekte koji će učiniti život i zdravlje stanovnika Kaknja boljim, te je rekao da je to prije svega proširenje mreže daljinskog grijanja.

**Mirza Fazlić (odgovor):** je rekao da je neumjesno od vijećnika Piljuga da na bazi paušalnih ocjena i informacija navodo da je nešto urađeno protivno propisima. Napomenu je da vijećnici imaju pravo prema Zakonu o pristupu informacijama da traže kompletnu dokumentaciju u vezi bilo kojeg projekta i provedene javne nabavke, kako bi sve nejasnoće provjerili. Po pitanju održavanja zelenih površina je rekao da se ta sredstva realizuju preko Zavoda i Vodokoma, da o svemu postoji uredna i obimna dokumentacija koja se može prezentirati svima koji žele da vide na što su utrošena predmetna sredstva. Po pitanju utopljanja ambulante Krševac rekao je da je provedenom javnom nabavkom pribavljenja ponuda niža od planiranih sredstava za tu fazu projekta, te je ostao dio sredstva za koji prihvata da se realizuje u tekućoj godini za radove na tom objektu. Na konstataciju vijećnika Mijoča je rekao da se predmetnom tačkom usvaja Izvještaj o realizaciji utrošenih sredstava po Programu koje je Vijeće usvojilo i zadužilo Službu da iste realizuje, te da je Zakonom o energetske efikasnosti i Zakonom o fondu okoliša jasno i decidno propisano šta se smatra projektima za zaštitu okoliša.

**Enes Piljug:** je rekao da je samo tražio da se obrazloži iznos utrošen na projekat „Eko-park“ Tršće, jer se iz Izvještaja to ne vidi.

Vijeće je sa 18 glasova za, 3 protiv i 1 uzdržan usvojilo Izvještaj o realizaciji Programa utroška namjenskih sredstava za zaštitu okoline iz budžeta Općine Kakanj za 2018. godinu.

#### **Tačka 5.**

#### **Izvještaj o realizaciji Programa utroška sredstava iz budžeta Općine Kakanj za podsticaje u poljoprivredi za 2018. godinu**

Predlagač: Općinski načelnik

Obrađivač: Služba za privredu, urbanizam i zaštitu okoline

Izjavitelj: Mirza Fazlić, pomoćnik općinskog načelnika

U diskusiji nije niko učestvovao i Izvještaj o realizaciji Programa utroška sredstava iz budžeta Općine Kakanj za podsticaje u poljoprivredi za 2018. godinu je usvojen jednoglasno sa 22 glasa za.

#### **Tačka 6.**

#### **Prijedlog programa utroška sredstava iz budžeta Općine Kakanj za podsticaje u poljoprivredi za 2019. godinu**

Predlagač: Općinski načelnik  
Obrađivač: Služba za privredu, urbanizam i zaštitu okoline  
Izjestilac: Mirza Fazlić, pomoćnik općinskog načelnika

U diskusiji su učestovali: Rešad Merdić, Safet Šahman, Nusret Muslić, Evelin Bitić i Rizah Haračić.

**Rešad Merdić:** je rekao da bi u Program dodao pod stavkom „Podsticaj za animalnu proizvodnju“ i „Podsticaj za uzgoj junica i tov junadi“ u visini od 5.000,00 KM i stavku „Podsticaj za poribljavanje naših rijeka“ u iznosu od 3.000,00 KM.

**Safet Šahman:** je rekao da su poljoprivredni proizvođači najugroženija kategorija stanovništva imajući u vidu sve nedaće sa kojima se susreću, pa je predložio da se poveća iznos za podsticaje u malinarstvu sa 0,12 KM na 0,15 KM, odnosno sa 0,18 KM na 0,20 KM, jer smatra da je veliki broj proizvođača malina odustao od proizvodnje, pa pretpostavlja da će u okviru planiranih sredstava ostati dovoljno sredstava da se podrže oni proizvođači koji su opstali. Predložio je još da se u Program za narednu godinu predvidi stavka, odnosno neki mehanizam za zaštitu poljoprivrednih proizvođača od elementarnih nepogoda.

**Nusret Muslić:** je naglasio da se predmetnim Programom znatno pomaže poljoprivrednim proizvođačima, te je predložio da, ukoliko ne postoje takve mjere, pokuša se iznaći metod da se pomogne proizvođačima da kvalitetno plasiraju svoje proizvode i predložio u tom cilju održavanje sastanka nadležnih općinskih službi sa predstavnicima velikih trgovačkih centara koji posluju u Kaknju, pa i šire.

**Evelin Bitić:** je naglasio da je ponosan što se velika sredstva iz Budžeta izdvajaju za podsticaje u poljoprivredi, pa je u tom pogledu predložio da se poveća iznos za otkupljivače kravljeg mlijeka sa 10.000,00 KM na 15.000,00 KM i da se poveća iznos za podsticaj registracije poljoprivredne djelatnosti kao osnovne djelatnosti sa 20.000,00 KM na 30.000,00 KM.

**Rizah Haračić:** je pohvalio što se svake godine sve više podržavaju poljoprivredni proizvođači, te je u tom kontekstu naglasio povećanje iznosa za podsticaje u pčelarstvu za one koji nisu registrovali pčelarstvo kao osnovnu djelatnost.

**Mirza Fazlić (odgovor):** je rekao da bi uvođenje novih stavki u Program predstavljalo problem Službi prilikom realizacije samog Programa, pa je u tom pogledu predložio da se usvoji zaključak kojim bi se naknadno obavezala Služba, nakon što se vidi da će na određenoj stavci ostati neutrošenih sredstava, da se onda ta stavka proširi za podsticaj u uzgoju i tovu junadi. Što se tiče podsticaja za malinarstvo rekao je da je i prethodnih godina bila praksa da se nakon što se završi sezona otkupa, izvrši preračun preostalih sredstava i višak sredstava predviđenih za tu stavku rasporedi otkupljivačima o čemu Vijeće donese odluku. Po pitanju uvođenja stavke za naknade za elementarne nepogode je rekao da to pitanje zahtjeva detaljniju analizu i pripremu, pa će se pokušati u narednoj godini nešto u tom pogledu predvidjeti u Programu. Po pitanju otkupa i distributivnih kanala je rekao da jedna stavka u Programu predviđa sredstva od 90.000,00 KM za izgradnju otkupne stanice u saradnji sa UNDP čija bi ukupna vrijednost bila oko 300.000,00 KM, gdje bi se vršilo sakupljanje proizvedenih proizvoda i stvarala bolja pregovaračka pozicija u razgovorima sa velikim otkupljivačima. Na prijedlog vijećnika Bitića za povećanje stavke za registraciju je rekao da je u prethodnim godinama planirani iznos bio dovoljan za sve koji su se odlučili za registraciju poljoprivredne djelatnosti, tako da smatra da će to biti slučaj i u tekućoj godini. Međutim, u slučaju da na nekoj od stavki ne bude dovoljno sredstava za sve korisnike, postoji mogućnost da se u zadnjem kvartalu godine napravi korekcija stavki i neutrošena sredstva sa pojedinih stavki preusmjere na stavke gdje bude nedostajalo sredstava. Što se tiče otkupljivača mlijeka je rekao da je teško odmah naći sredstva, odnosno ista skinuti sa neke stavke kako bi se ova povećala, te je naglasio da postoji jedan otkupljivač trenutno na području općine i da je u ovom trenutku bitnije obezbjediti podsticaj za preradu mlijeka za što je predviđena stavka u programu.

**Rešad Merdić:** je pojasnio odakle je planirao da se obezbjede sredstva za predložene nove stavke, pa je rekao da bi se moglo 6.000,00 KM skinuti sa stavke podsticaja za jagodičasto voće, obzirom da sve govori da će tih proizvođača biti manje u tekućoj godini, te da se nedostajuće 2.000,00 KM obezbjede umanjivanjem stavke rezervi.

Predsjedavajući je da o pauzu od 5 minuta.

**Mirza Fazlić:** je naglasio da bi uvođenje novih stavki zahtjevalo utvrđivanje kriterija i razradu same pozicije, te ostaje pri osnovnom prijedlogu Programa, ali je predložio da se za 6 mjeseci uradi analiza utroška i u slučaju procjene postojanja viška sredstava, detaljno pripreme koraci za uvođenje novih stavki i jasno utvrdi sa kojih stavki se obezbjeđuju sredstva.

Nakon diskusije Vijeće je usvojilo Program utroška sredstava iz budžeta Općine Kakanj za podsticaje u poljoprivredi za 2019. godinu sa 21 glasom za, bez glasova protiv i uzdržan.

#### **Tačka 7.**

#### **Izveštaj o realizaciji Programa utroška sredstava iz budžeta Općine Kakanj za podsticaj razvoja poduzetništva i obrta za 2018. godinu**

Predlagač: Općinski načelnik

Obrađivač: Služba za privredu, urbanizam i zaštitu okoline

Izjestilac: Mirza Fazlić, pomoćnik općinskog načelnika

U diskusiji je učestvovao: Nusret Muslić.

**Nusret Muslić:** je postavio dva pitanja u vezi Izveštaja i to oko refundacije troškova osnivanja obrtničkih i ugostiteljskih radnji i dijela troškova osnivanja preduzeća za što je utrošeno 33.000,00 KM, da mu se odgovori i kojoj mjeri je finansiranje istih pomoglo da se održe u poslovanju i drugo pitanje u vezi projekta „Pokreni svoj posao“, gdje ga interesuje koji su efekti ulaganja u projekat koji je aktuelan već nekoliko godina, koliko korisnika je opstalo i koje su djelatnosti koje imaju perspektivu da korištenjem projekta opstanu u budućnosti.

**Mirza Fazlić (odgovor):** što se tiče prvog pitanja rekao je da u Izveštaju naveden broj korisnika, a da je osnovni cilj predmetne stavke da se onima koji se odluče da krenu u samostalni biznis kaže da će troškovi osnivanja, odnosno registracije biti besplatni. Po pitanju projekta „Pokreni svoj posao“ registrovano je preko 100 korisnika od koji je 70% nastavilo sa radom. Djelatnosti koje su se pokazale kao perspektivne su metalska i druge zanatske djelatnosti, dok je spektar djelatnosti koje su finansirane iz projekta veoma raznovrstan, tačnije to su gotovo sve djelatnosti.

Izveštaj o realizaciji Programa utroška sredstava iz budžeta Općine Kakanj za podsticaj razvoja poduzetništva i obrta za 2018. godinu je usvojen jednoglasno sa 20 glasova za.

#### **Tačka 8.**

#### **Prijedlog programa utroška sredstava iz budžeta Općine Kakanj za podsticaj razvoja poduzetništva i obrta za 2019. godinu**

Predlagač: Općinski načelnik

Obrađivač: Služba za privredu, urbanizam i zaštitu okoline

Izjestilac: Mirza Fazlić, pomoćnik općinskog načelnika

U diskusiji je učestvovao Safet Šahman i Rešad Merdić.

**Safet Šahman:** je predložio da se u okviru projekta „Pokreni svoj posao“ da mogućnost da se sredstva pravdaju notarski obrađenim kuporodajnim ugovorom u situacijama kada korisnik kupi polovnu stvar za koju ne može dobiti fiskalni račun.

**Mirza Fazlić:** je rekao da se prilikom kupovinom polovne robe od registrovanih firmi dobije fiskalni račun, a da takva kupovina od fizičkih lica nije prihvatljiva iz razloga što se u tim slučajevima ne može utvrditi porijeklo robe i ostavlja se prostor za određene nejasnoće.

**Rešad Merdić:** je predložio da se u navedenim slučajevima umjesto notarskog ugovora može tražiti da korisnik priloži nalaz ovlaštenog vještaka i da to bude način pravdanja sredstava, ukoliko korisnik ne može obezbjeđiti fiskalni račun.

**Mirza Fazlić:** je prihvatio prijedlog vijećnika Merdića, s tim da je dodao da je uz nalaz vještaka potrebno priložiti i dokaz o porijeklu robe.

Nakon diskusije Vijeće je usvojilo Program utroška sredstava iz budžeta Općine Kakanj za podsticaj razvoja poduzetništva i obrta za 2019. godinu jednoglasno sa 22 glasa za.

#### **Tačka 9.**

**Prijedlog programa rasporeda i utroška planiranih sredstava ostvarenih po osnovu posebne naknade za zaštitu od prirodnih i drugih nesreća namijenjenih za provođenje preventivnih mjera u 2019. godini**

Predlagač: Općinski načelnik

Obrađivač: Služba civilne zaštite

Izjavitelj: Nurudin Hrusto, pomoćnik općinskog načelnika

U diskusiji nije niko učestvovao i Vijeće je Program rasporeda i utroška planiranih sredstava ostvarenih po osnovu posebne naknade za zaštitu od prirodnih i drugih nesreća namijenjenih za provođenje preventivnih mjera u 2019. godini usvojilo jednoglasno sa 21 glasom za.

#### **Tačka 10.**

**Prijedlog zaključka o davanju saglasnosti na Pravilnik o koeficijentima i platnim razredima JU za predškolski odgoj i obrazovanje „Mladost“ Kakanj**

Predlagač: UO JU za predškolski odgoj i obrazovanje „Mladost“ Kakanj

Obrađivač: UO JU za predškolski odgoj i obrazovanje „Mladost“ Kakanj

Izjavitelj: Helmina Murtić, direktorica JU i Mirsada Čaluk, predsjednica UO JU

U diskusiji nije niko učestvovao i Vijeće je Zaključak o davanju saglasnosti na Pravilnik o koeficijentima i platnim razredima JU za predškolski odgoj i obrazovanje „Mladost“ Kakanj usvojilo jednoglasno sa 22 glasa za.

#### **Tačka 11.**

**Prijedlog zaključka o davanju saglasnosti na Finansijski plan JU za predškolski odgoj i obrazovanje „Mladost“ Kakanj**

Predlagač: UO JU za predškolski odgoj i obrazovanje „Mladost“ Kakanj

Obrađivač: UO JU za predškolski odgoj i obrazovanje „Mladost“ Kakanj

Izjavitelj: Helmina Murtić, direktorica JU i Mirsada Čaluk, predsjednica UO JU

U diskusiji nije niko učestvovao i Vijeće je Zaključak o davanju saglasnosti na Finansijski plan JU za predškolski odgoj i obrazovanje „Mladost“ Kakanj usvojilo jednoglasno sa 22 glasa za.

#### **Tačka 12.**

**Prijedlog rješenja o utvrđivanju prava vlasništva u korist Emira (Hamze) Husike iz Kakanja**

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Alem Škulj, Služba za imovinskopravne, geodetske poslove i katastar nekretnina

U diskusiji nije niko učestvovao i Rješenje o utvrđivanju prava vlasništva u korist Emira (Hamze) Husike iz Kakanja je usvojeno jednoglasno sa 22 glasa za.

#### **Tačka 13.**

**Informacija o stanju javnog reda i mira, sigurnosti ljudi i imovine za 2018. godinu na području općine Kakanj**

Predlagač: Policijska stanica Kakanj  
Obrađivač: policijska stanica Kakanj  
Izjestilac: Vahidin Topalović, komandir PS

U diskusiji nije niko učestvovao i Vijeće je Informaciju o stanju javnog reda i mira, sigurnosti ljudi i imovine za 2018. godinu na području općine Kakanj primilo k znanju jednoglasno sa 21 glasom za.

#### **Tačka 14.**

#### **Informacija o poduzetim operativnim, sanacionim mjerama i drugim aktivnostima u periodu stanja prirodne nesreće na cjelokupnom području općine Kakanj**

Predlagač: Općinski načelnik  
Obrađivač: Služba civilne zaštite  
Izjestilac: Nurudin Hrusto, pomoćnik općinskog načelnika

U diskusiji je učestvovao Rizah Haračić i Semir Mušija.

**Rizah Haračić:** je naglasio da posljednje štete usljed poplava nisu jedine za koje su odgovorni viši nivoi, tačnije Agencija za sliv rijeke Save. Rekao je da smatra da Služba civilne zaštite fantastično obavlja svoj posao, ali da se konstantno dešava da zbog ne izvršavanja tuđih obaveza ispaštaju stanovnici Kakanja, pa je predložio da Vijeće usvoji zaključak kojim bi se od navedene Agencije tražilo da namire štete nastale posljednjim polavama.

**Nurudin Hrusto:** je rekao da je jedna od osnovnih zadaća Agencije izgradnja obaloutvrda uz rijeku Bosnu, zatim čišćenje korita rijeke i sječenje i održavanje stabala i rastinja uz rijeku, a da ista područje Kakanja redovno zaobilazi u svojim projektima.

**Općinski načelnik:** je rekao da smatra da se na osnovu predmetne informacije, koja je već prosljeđena Federalnoj upravi civilne zaštite, može sačiniti akt prema Agenciji koji bi se još dopunio informacijama o posljedicama poplava iz 2012. i 2016. godine, pa je predložio da se zaduži Služba da kompletira takav akt i uputi ga Agenciji uz zahtjev za naknadu šteta. Rekao je da je skeptičan po pitanju naknada šteta od strane Agencije, ali osnovno je da ista konačno i na području općine Kakanj počne obavljati svoje obaveze zbog kojih je osnovana.

**Semir Mušija:** je predložio da Vijeće usvoji zaključak kojim traži od Agencije da izvršava svoje zakonom propisane obaveze, a da prilog zaključku bude predmetna informacija.

Predsjedavajući je predložio da Vijeće donese zaključak kojim se ovlašćuju općinski načelnik, predsjedavajući OV i šef Službe civilne zaštite da utvrde set zaključaka koji će biti prosljeđen Agenciji, a da se Vijeće naknadno izvjesti o sadržaju zaključaka.

Informacija o poduzetim operativnim, sanacionim mjerama i drugim aktivnostima u periodu stanja prirodne nesreće na cjelokupnom području općine Kakanj je primljena k znanju jednoglasno uz predloženi zaključak predsjedavajućeg Vijeća sa 21 glasom za.

Predsjedavajući je čestitao 1.mart – Dan nezavisnosti BiH i zaključio rad 27. sjednice Općinskog vijeća u 14:35 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR  
OPĆINSKOG VIJEĆA**  
Ferdo Mijač

**PREDSJEDAVALAČI  
OPĆINSKOG VIJEĆA**  
Slaven Katičić